

# Dr. M hurai masaalah kepimpinan masyarakat Melayu

KUALA LUMPUR, Rabu. — Timbalan Perdana Menteri, Dr. Mahathir Mohamad, malam ini menyebut tentang kelamkabut yang timbul di segi kepimpinan orang Melayu, selepas negeri ini mengamalkan sistem demokrasi.

Sebabnya ialah, sistem demokrasi memberi peluang siapa sahaja untuk menjadi pemimpin. Jadi mereka muncul seperti cendawan.

Berikutan dengan itu, pemimpin-pemimpin dari berbagai golongan ini menyuruh orang-orang Melayu berbuat itu dan ini.

"Tidak hairanlah kenapa orang Melayu sudah menjadi tidak tentu arah sekarang, tidak tahu haluan dan matlamat yang nak dituju," kata Dr. Mahathir.

Beliau menyebut demikian ketika berucap merasmikan simposium "Kepimpinan Orang Melayu" di Universiti Malaya di sini.

Simposium tersebut dianjurkan bersama oleh Jabatan Pengajian Melayu universiti itu, dan Persatuan Bahasa Melayu Universiti Malaya. (Kandungan penuh ucapan Dr. Mahathir itu disiarkan di Muka 6).

## Perpaduan

Kalau dalam tahun-tahun 1946 — 1957 mereka kukuh perpaduan dan dapat membulatkan tenaga untuk mencapai matlamat yang ditentukan oleh pemimpin mereka, sekarang mereka terbahagi kepada beribu-ribu kumpulan yang sering bercakaran di antara satu sama lain.

Menurut Dr. Mahathir lagi, dahulu hampir semua orang Melayu adalah nasionalis yang sayang kepada bangsa mereka.

Sekarang ada yang dengan lantang berkata, menjadi nasionalis Melayu adalah sempit dan

tidak Islam.

Ada yang berjalan ke merata-rata dunia Islam untuk memburukkan orang Melayu dan Kerajaan pimpinan orang Melayu sebagai Kerajaan yang cuma nasionalis dan tidak begitu Islam.

## Mengecam

Menurut Dr. Mahathir, orang Melayu yang mendengar dan melihat pemimpin Melayu yang kutuk nasionalisme Melayu, mula hilang kepercayaan kepada pentingnya nasionalisme untuk menentukan nasib orang Melayu dan nasib agama Islam yang dianuti oleh mereka.

Katanya lagi, ada pula orang Melayu yang bersahabat dengan orang lain di luar dan di dalam negeri untuk mengutuk nasionalisme Melayu.

Orang seperti ini juga sanggup pergi keluar negeri dan dari jauh mengecam dan memburukkan negara sendiri dan kepimpinan yang berteras Melayu.

Orang ini kononnya patriot dan kalau dipuji oleh orang lain, terutama yang kulit putih maka kembanglah mereka dan sangguplah mereka menggeliru lagi orang Melayu dengan kepimpinan mereka.

Ramai juga orang Melayu yang terikut-ikut dengan pendapat orang-orang ini dan menambah pecahbelah di kalangan orang Melayu, kata Dr. Mahathir.

## Memilih

Beliau menambah, bagi orang Melayu yang ramai, memilih yang mana satu yang benar tidak begitu mudah.

Jika didengar pidato dan keterangan tiap-tiap seorang yang berlagak sebagai pemimpin, keyakinan dan penjelasan nampaknya begitu nyata dan bernas sehingga pemimpin itu tetap boleh diterima.

Tetapi pemimpin yang lain juga nampaknya benar dan boleh diterima.

Malangnya pemimpin-pemimpin itu tidak sama pendapat, bahkan terus bertentangan.

Jadi sukarlah orang Melayu nak pilih.

Kata Dr. Mahathir lagi, simposium itu diusahakan oleh cerdik-pandai Melayu, jadi dengan sendirinya cerdik-pandai adalah pemimpin.

Adanya simposium ini membuktikan pandangan berat oleh pemimpin dari cerdik-pandai ini terhadap masalah kepimpinan Melayu.

jawatan, mula diragu kan sehingga akhirnya ia mempunyai rupa buruk sebagai yang ditu duh. Penyokong-penyokong mula mengasing kan diri takut mereka juga terlibat dengan ke jatuhan pemimpin mereka.

Akhirnya, jatuhlah pemimpin itu. Tetapi saju rus selepas ia jatuh maka bermulalah keluhan. Bukanlah pemimpin ini yang berjuang untuk kita? Tidakkah ia memberi semua tenaga dan masanya untuk kita? Tidak mungkinkah ia dianlaya?

Semakin jauh pemimpin itu terpisah dari kuasa, semakin baik untuk imejnya. Semua kesalahannya dilupakan, ataupun sekurangnya tidak disebutkan. Mereka yang dahulunya mengecam sekarang menyanyi pujiannya. Tidakkah kepimpinannya membawa kepada zaman yang gilang-gemilang?

Tetapi kalaulah pujian ini berkesan dan pemimpin itu dipilih semula dan diberi kuasa, maka sekali lagi proses memburukkannya akan bermula. Sekali lagi berbagai tuduhan dibuat. Sekali lagi usahanya akan dihalang.

Semua proses ini berlaku dalam semua masyarakat manusia sejak zaman purba. Ianya berlaku kepada Julius Caesar dan juga kepada Presiden Nixon. Tetapi apabila proses ini berlaku dikalangan orang Melayu yang baru sahaja berubah dari sistem feodal kepada sistem bebas, kesannya agak lebih buruk.

Masyarakat orang Melayu belum kukuh. Negara yang diduduki oleh orang Melayu bukan diduduki oleh mereka sahaja. Pembangunan orang Melayu belum sempurna. Kedudukan mereka di hampir semua lapangan amatlah lemah.

Apabila masyarakat Melayu ini diserang oleh proses yang disebut tadi, maka mereka menerima akibat yang lebih buruk. Orang Melayu sekarang sudah hampir tidak tahu arah. Mengikut salah, tak mengikut pun salah. Berkecuall salah, tak berkecuall pun salah.

Gambaran ini mungkin keterlaluan. Tetapi keterlaluan adalah realtif. Apa yang keterlaluan dahulu adalah perkara biasa sekarang, dan apa yang keterlaluan dipandang dari kacamata sekarang menjadi perkara biasa di masa akan datang. Dilihat dari kacamata 1947 dan 1957, masaalah kepimpinan orang Melayu sekarang adalah terlalu buruk.

Simposium ini disusun oleh cerdik-pandai Melayu. Secara otomatik cerdik-pandai adalah pemimpin. Adanya simposium ini membuktikan pandangan yang serius oleh pemimpin cerdik-pandai terhadap masaalah kepimpinan orang Melayu.

Umumnya cerdik-pandai Melayu adalah dari golongan yang muda. Samada disukai atau tidak oleh golongan tua seperti saya, cerdik-pandai yang muda ini akan mempengaruhi kepimpinan orang Melayu dan terus akan mewarisi kepimpinan ini. Golongan tua boleh berkempen menentang pencalunan pemimpin yang berijazah berjela-jela tetapi proses yang tidak dapat dihalang akan mengubah yang tua ke alam baka. Jika tidak sebelum daripada itu, sekurangnya selepas itu pemimpin cerdik-pandai muda akan takeover.

Saya cuma boleh berdoa. Saya berdoa simposium ini akan berjaya menganalisa sejarah dan masaalah kepimpinan orang Melayu. Saya berdoa membawa simposium ini tidak akan

menjadi forum lepas geram. Saya berdoa simposium ini tidak akan menjadi forum memburuk pemimpin dan menegak kepimpinan kumpulan-kumpulan tertentu yang belum dapat tempat. Akhirnya saya berdoa simposium ini tidak akan menambah kekeliruan yang sudahpun banyak di kalangan orang Melayu sehingga mereka tidak akan percaya kepada apa juga kepimpinan Melayu seperti mereka sekarang tidak lagi percaya kepada syarikat-syarikat anjuran orang Melayu.

Dengan nota yang tidak begitu bersemangat saya rasmikan simposium ini. Mudah-mudahan Allah memberi taufik dan hidayat kepada kita semua.